

Rumusan Dasar-dasar Penting Perakaunan bagi tahun berakhir 31 Disember 2000

Semua dasar-dasar perakaunan penting yang dinyatakan di bawah adalah sama dengan yang digunakan pada tahun lepas.

A Asas Penyediaan

Penyata-penyata kewangan telah disediakan menurut konvensyen kos sejarah, kecuali dinyatakan dalam rumusan dasar-dasar penting perakaunan.

Penyata-penyata kewangan Kumpulan dan Bank telah disediakan menurut piawaian-piawaian perakaunan yang diluluskan dan berkenaan di Malaysia, Garis Panduan Bank Negara Malaysia dan peruntukan Akta Syarikat, 1965. Penyata-penyata kewangan ini menggabungkan aktiviti-aktiviti yang berkaitan dengan skim Perbankan Islam yang dijalankan oleh Bank. Skim Perbankan Islam yang dijalankan pada amnya merujuk kepada penerimaan deposit dan pemberian pembiayaan mengikut prinsip-prinsip Syariah.

B Asas Penyatuan

Penyata kewangan disatukan mengandungi penyata kewangan Bank dan syarikat-syarikat subsidiarinya, yang disediakan sehingga akhir tahun kewangan.

Syarikat-syarikat subsidiari disatukan dari tarikh di mana penguasaan syarikat beralih kepada Kumpulan dan tidak lagi disatukan pada tarikh penguasaan syarikat berhenti. Syarikat-syarikat subsidiari disatukan menggunakan kaedah perakaunan pembelian.

Dalam kaedah perakaunan pembelian, keputusan kewangan syarikat-syarikat subsidiari yang dibeli atau dijual akan termasuk dari tarikh pembelian sehingga tarikh penjualan. Pada tarikh pembelian, nilai buku bersih syarikat-syarikat subsidiari akan ditentukan dan nilai ini akan disatukan dalam penyata-penyata kewangan. Perbezaan di antara kos pembelian dengan nilai buku bersih syarikat-syarikat subsidiari akan dianggap sebagai muhibbah atau rizab di atas penyatuan.

Urusniaga antara syarikat telah dihapuskan semasa penyatuan dan penyata kewangan yang disatukan mencerminkan urusniaga luaran sahaja. Di mana perlu, dasar perakaunan untuk syarikat-syarikat subsidiari telah ditukar untuk memastikan persamaan dengan dasar perakaunan Kumpulan.

Untung atau rugi atas penjualan syarikat subsidiari adalah perbezaan di antara hasil bersih daripada penjualan dan nilai buku bersih bahagian Kumpulan dengan baki muhibbah atas pembelian yang belum dilunaskan.

Senarai syarikat-syarikat subsidiari dinyatakan di dalam Nota 9 kepada penyata kewangan.

C Pengiktirafan Pendapatan Faedah

Pendapatan faedah diiktirafkan atas dasar akrual. Pengiktirafan pendapatan faedah daripada pinjaman-pinjaman yang dikelaskan tidak berbayar, digantung sehingga diperolehi secara tunai.

Akaun pelanggan dikelaskan sebagai pinjaman tidak berbayar apabila pembayaran balik tertunggak selama enam bulan atau lebih, dikira dari hari pertama kegagalan bagi pinjaman dan overdraf, selepas 14 hari dari tarikh kematangan bagi bil perdagangan dan penerimaan amanah, dan serta-merta selepas tarikh kematangan bagi penerimaan jurubank.

Peruntukan untuk pinjaman dan pembiayaan yang dikelaskan sebagai tidak berbayar yang dibuat oleh Bank adalah selaras dengan peruntukan minima dalam "Garis Panduan Pengkelasan Pinjaman Tidak Berbayar dan Peruntukan Hutang Ragu dan Hutang Lapuk, BNM/GP3 (Garis Panduan) pada 31 Disember 2000, manakala dasar penggantungan faedah bagi bil dagangan, resit amanah dan penerimaan jurubank adalah lebih ketat berbanding dengan garis panduan yang ditetapkan.

D Pengiktirafan Yuran dan Pendapatan Lain

Yuran penyusunan pinjaman dan komisen diiktiraf sebagai pendapatan apabila semua syarat-syarat yang ditetapkan telah dipenuhi.

Yuran penglibatan dan jaminan yang penting diiktiraf sebagai pendapatan berdasarkan pembahagian masa.

Dividen dari sekuriti dagangan diiktiraf apabila diterima. Dividen dari sekuriti pelaburan diiktiraf apabila diisytiharkan.

Pendapatan dari perniagaan Skim Perbankan Islam diiktiraf pada asas akrual mengikut BNM/GP8.

E Peruntukan bagi Hutang Lapuk dan Hutang Ragu dan Pembiayaan

Peruntukan khusus adalah dibuat bagi hutang ragu berdasarkan penilaian terperinci pihak pengurusan ke atas status pinjaman, pendahuluan dan pembiayaan dan cagaran-cagaran yang disandarkan.

Peruntukan am berdasarkan secara peratusan portfolio pinjaman dan pembiayaan juga dibuat untuk menampung sebarang kerugian yang berkemungkinan tidak dikenalpasti secara khusus.

Pinjaman dan pembiayaan yang tidak berjaya dikutip ataupun pinjaman dan pembiayaan yang dikelaskan sebagai lapuk akan dihapuskan selepas mempertimbangkan nilai perolehan cagaran, jika ada, apabila pihak pengurusan berpendapat bahawa tiada harapan bagi memulihkan pinjaman tersebut.

Peruntukan untuk pinjaman dan pembiayaan tidak berbayar adalah menurut taraf minima yang diperlukan oleh Bank Negara Malaysia dalam "Garis Panduan Pengkelasan Pinjaman Tidak Berbayar dan Peruntukan Hutang Ragu dan Hutang Lapuk, BNM/GP3".

Rumusan Dasar-dasar Penting Perakaunan bagi tahun berakhir 31 Disember 2000 (sambungan)

F Sekuriti Dagangan

Sekuriti dagangan adalah sekuriti-sekuriti pasaran yang dibeli dan dipegang dengan tujuan untuk dijualbalik dalam jangka pendek, dan dinyatakan pada nilai terendah di antara nilai kos dan nilai pasaran.

Pindahan, jika ada, di antara sekuriti dagangan dan pelaburan dilakukan pada nilai terendah di antara nilai kos dan nilai pasaran.

G Sekuriti Pelaburan

Sekuriti pelaburan adalah sekuriti-sekuriti yang diperolehi dan dipegang untuk hasil dan pertumbuhan modal atau untuk memenuhi kehendak kecairan aset minimum menurut Seksyen 38 Akta Bank dan Institusi-Institusi Kewangan 1989, dan lazimnya dipegang hingga matang.

Sekuriti Kerajaan Malaysia, Sijil Pelaburan Kerajaan Malaysia, Bon Cagamas, Sekuriti Kerajaan lain, Sekuriti Hutang Swasta Jaminan Bank dan Sekuriti Hutang Swasta yang dikecualikan oleh Bank Negara Malaysia dipegang untuk pelaburan dan dinyatakan pada nilai kos dan diselaraskan untuk pelunasan premium atau peningkatan nilai diskaun hingga tarikh kematangan. Sekuriti Hutang Swasta lain dinilai pada nilai terendah di antara nilai kos dan nilai pasaran. Sekuriti pelaburan lain dinyatakan pada nilai kos dan peruntukan rosotnilai dibuat sekiranya berlaku pengurangan nilai yang kekal.

Pindahan, jika ada, di antara sekuriti pelaburan dan dagangan dilakukan pada nilai terendah di antara nilai bersih yang direkodkan dan nilai pasaran.

H Perjanjian Beli Balik

Sekuriti yang dibeli melalui perjanjian beli balik adalah sekuriti yang telah dibeli oleh Bank dengan komitmen untuk dijual balik pada masa hadapan. Komitmen untuk menjual balik sekuriti adalah ditunjukkan sebagai satu aset dalam lembaranimbangan.

Sebaliknya, tanggungan bagi sekuriti yang dijual melalui beli balik adalah sekuriti yang telah dijual oleh Bank daripada portfolionya, dengan komitmen untuk dibeli balik pada masa hadapan. Komitmen untuk membeli balik sekuriti adalah ditunjukkan sebagai satu liabiliti dalam lembaranimbangan.

I Pelaburan di Dalam Syarikat-syarikat Subsidiari

Syarikat subsidiari adalah syarikat di mana Bank menguasai ahli lembaga pengarahnya atau mempunyai lebih daripada setengah kuasa mengundi, atau memegang lebih daripada setengah modal saham biasa berbayar.

Pelaburan di dalam syarikat-syarikat subsidiari dinyatakan pada nilai kos dan peruntukan dibuat apabila, pada pendapat para Pengarah, berlakunya rosotnilai berkekalan ke atas pelaburan tersebut.

J Aset Tetap dan Susutnilai

Aset tetap dinyatakan pada kos ditolak susutnilai terkumpul.

Susutnilai tidak diperuntukan ke atas tanah milik bebas dan modal kerja dalam pelaksanaan. Susutnilai aset tetap lain dikira untuk menghapuskan kos aset mengikut kaedah garisan lurus berdasarkan jangkamasa anggaran hayat kegunaan aset tetap berkenaan. Kadar utama susutnilai tahunan adalah:

| | |
|---|---|
| Bangunan | 2% |
| Tanah dan bangunan milik pajak | Dilunaskan sepanjang tempoh pajakan |
| Pengubahsuaian dan bangunan di atas tanah milik pajak | 20% atau tempoh pajakan, yang mana lebih tinggi |
| Kelengkapan pejabat dan perabot | 10% |
| Alat-alat dan perisian komputer | 20% |
| Kenderaan bermotor | 20% |

K Aset Pajak

Aset-aset pajak yang tertentu memindahkan risiko dan pulangan atas pemilikan aset kepada Bank adalah diambilkira sebagai aset tetap. Aset-aset dan pajak tersebut dinyatakan pada nilai semasa terendah atas bayaran pajak yang minimum atau nilai saksama atas aset pajak pada permulaan tempoh pajak. Aset-aset pajak tersebut disusutnilaikan selaras dengan aset-aset bersusutnilai yang dimiliki.

Pajak yang tidak memenuhi kriteria-kriteria tersebut adalah dikelaskan sebagai pajak operasi dan pembayaran sewa tersebut dipindahkan kepada penyata pendapatan apabila perlu dibayar.

L Bil-bil dan Penerimaan Harus Dibayar

Bil-bil dan penerimaan harus dibayar merupakan bil-bil kepunyaan Bank dan penerimaan yang didiskaun semula dan tertunggak di dalam pasaran.

Rumusan Dasar-dasar Penting Perakaunan bagi tahun berakhir 31 Disember 2000 (sambungan)

M Kontrak Tukaran Hadapan

Kontrak tukaran hadapan yang belum matang dinilai mengikut kadar hadapan seperti pada tarikh lembaran imbangan, mengikut tarikh kematangan masing-masing. Keuntungan atau kerugian yang belum diperolehi yang tidak dikenalpasti adalah diiktirafkan di dalam penyata pendapatan bagi tahun tersebut.

N Pertukaran Matawang

Setiap aset dan liabiliti dalam matawang asing ditukarkan kepada Ringgit Malaysia di dalam lembaran imbangan pada kadar semasa pertukaran di mana anggarannya hampir dengan yang berkuatkuasa pada tarikh lembaran imbangan. Butiran penyata pendapatan ditukarkan mengikut kadar pertukaran yang berkuatkuasa pada tarikh urusniaga.

Kadar tutup utama yang digunakan dalam pertukaran matawang asing adalah seperti berikut:

| | 2000 RM | 1999 RM |
|---------------------------|------------|------------|
| Matawang asing | | |
| - Dollar Amerika Syarikat | 3.80 | 3.80 |
| - Paun Sterling | 5.68 | 6.15 |

O Cukai Tertunda

Peruntukan untuk cukai tertunda dibuat mengikut kaedah liabiliti ke atas semua perbezaan masa yang nyata. Walaupun demikian, di mana perbezaan masa akan menghasilkan faedah cukai tertunda, faedah bersih tersebut tidak diiktiraf.

P Faedah Persaraan Kakitangan

Pihak Kumpulan mengendalikan satu skim faedah persaraan bagi eksekutif senior, eksekutif dan setiausaha sulit berdasarkan pelan takrif faedah. Aset skim tersebut dipegang secara berasingan dari Kumpulan dalam satu tabung yang ditadbir secara berasingan. Sumbangan kepada skim tersebut diperuntukkan di dalam penyata pendapatan supaya ia meliputi jangkamasa perkhidmatan kakitangan di dalam Kumpulan. Sumbangan-sumbangan ditentukan oleh juruakuari luar berdasarkan penilaian tiga tahun sekali dengan menggunakan kaedah faedah terakru.

Andaian yang digunakan bagi penilaian aktuari terakhir disertakan dalam Nota 27 kepada penyata kewangan.

Q Jumlah Akan Diterima Semula Daripada Danaharta

Ini adalah berkaitan pinjaman yang dijual kepada Danaharta di mana jumlah telah diterima dalam dua bahagian, iaitu pada masa jualan pinjaman (penerimaan awal) dan pada masa pinjaman dipungut (penerimaan akhir). Penerimaan akhir merupakan bahagian Bank yang telah ditetapkan atas lebih selepas ditolak penerimaan awal apabila pinjaman berkenaan dipungut. Perbezaan antara nilai bawahan pinjaman dan penerimaan awal diiktiraf sebagai "Jumlah boleh dituntut dari Danaharta" dalam komponen "Lain-lain aset" dalam lembaran imbangan. Peruntukan untuk jumlah ini adalah mengikut Garis Panduan Bank Negara untuk 'Jualan Pinjaman Tidak Berbayar kepada Danaharta' yang dikeluarkan pada 30 April 1999 dan mencerminkan penilaian para pengarah terhadap nilai nyata penerimaan akhir pada tarikh lembaran imbangan.

R Alatan Kewangan Derivatif

Transaksi untuk alatan kewangan derivatif yang dikendalikan termasuk pertukaran kadar faedah, pasaran hadapan dan lain-lain alatan seperti itu bagi tujuan urusniaga dan bukan urusniaga. Derivatif yang diklasifikasikan sebagai bukan urusniaga dipegang untuk tujuan membentengi pendedahan yang melibatkan aset-aset dan liabiliti-liabiliti Bank.

Perolehan dan kerugian akibat dari pembentengan transaksi-transaksi khusus adalah dilepaskan ke penyata pendapatan pada tempoh yang sama pendapatan dan perbelanjaan dijana dari transaksi-transaksi berkenaan.

Perolehan dan kerugian dari alatan yang dibeli atau dijual untuk tujuan urusniaga dibawa ke penyata pendapatan. Transaksi-transaksi yang tertinggal pada tarikh lembaran imbangan dinyatakan pada nilai pasaran.

S Tunai dan Setara Tunai

Tunai dan setara tunai terdiri dari tunai dan dana jangka pendek.

T Zakat

Zakat merupakan kewajipan yang perlu dilunaskan oleh Bank mengikut prinsip-prinsip syariah dan seperti yang dipersetujui oleh Majlis Penyeliaan Syariah.